

四庫全書

集部

欽定四庫全書

大復集卷二十

明 何景明 撰

五言律詩八十五首

駕出

九重玄武仗萬歲羽林軍  
朝帝乘輿出行天警蹕聞螭  
頭蟠曉日雉尾拂春雲  
佇望南郊氣遙連北斗文

大祀

金榜星辰幕瑤函海嶽編受禧  
同漢室登禪異秦年日

抱龍旗轉天流羽蓋旋楊雄老陪從白首賦甘泉

駕幸南海子

鐃音發桂時春狩踐蘭區水盡緹城合山迴帳殿孤公  
卿隨八駿虎旅備三驅如聞後車載倘遇渭川夫

駕入

地轉瑤壇迴天迴翠輦高入城傳鼓吹開殿引旌旄珮  
委春池草盤行上苑桃九天燈燭裏齊拜袞龍袍

慶成宴

漢主汾遊日周王鎬宴時禮成天地協樂奏鳳凰儀上  
殿承天語登筵拜帝釐載歌天保頌還稱既醉詩

皇陵

陵闕皇靈閔山河王氣遙萬年龍虎抱每夜鬼神朝玉  
盤留天地金燈照寂寥如看翠華度縹緲在青霄

內直

閣院雨晴初微風動綺疏鳳池通紫極雲闕過

一作清迥

虛衮職聞封事軍情見捷書非才叨侍從徒望五雲車

入直

賦宣文園客名慚騎省郎聞鷄趨建禮駐馬望宮牆風  
晝楊花色烟春蕙草香露盤天漢上消渴意何長

晚出左掖

洞門餘積雪御苑覆高霞吏散層霄上城行五鳳斜青  
回初霽柳紅動峭寒花立馬清沙外空

一作宮

林集暮鴉

奉和嚴太史謁泰陵三首

敬皇十八載四海一何安鼎成棄萬國弓墮哭千官白

日園陵閱秋雲松栢寒龍遊萬歲後寂寞葬衣冠

二

世切如雲望天摧格帝功彌留念諸將顧命託三公玉  
几星辰上玄宮霜露中松楸慟哭地白日起悲風

三

夜壑霜鍾杳秋岑玉殿扃總帷風淅淅銀海月冥冥象  
衛朝羣帝龍藏扈百靈臨門日呼召天語舊臣聆

酬郭內翰上陵還詩

帝遣朝陵日暫辭供奉班  
楸梧開玉殿雲霧宿春山  
晚向松間散晴從花下還  
知君有佳句傳和五陵間

答潘都諫郊壇見遺之作

羽衛天行路龍帷御宿亭  
璧壇流霽月銀闕動春星  
諫獵心空赤逢時鬢尚青  
極知陪從地瞻切五雲停

殿試宿禮部張子淳郎中署奉和馬張二光祿  
喬直閣諸公

東殿春朝晚南宮夜宿深  
鎖闌猶月色開閣更松陰  
地

迥神仙接天高象緯臨諸君清廟作三嘆有餘音

得顧華玉全州書無知望之消息

地北憐為別天南真可哀同時萬里去隔歲一書來水  
濶蛟龍出山深杜若開相思有詞賦愁絕並登臺

得朝信惟學書

稍喜豺狼息仍悲鴻鴈音故人雙尺素遙比萬黃金水  
上春花樹城邊秋竹林天涯暮風雨腸斷北山吟

得鄭繼之書



鄭生湖海去高興渺難降累月音書數清秋涕淚雙天  
邊登越嶠雪裏渡吳江萬水千山暮何時到爾邦

得王子衡贛榆書

萬里一書劄逾年傳帝都竄身天地遠垂淚海雲孤柳  
送燕臺駿花留漢殿鳬赤霄終道路白髮且江湖

次韻張郎中九日無菊

九日盃空綠秋城菊未花雨叢寒慘淡風樹晚歌斜獨  
客悲漂梗佳人怨折麻何時開爛熳沽酒到君家

除夕和以道懷弟之作

汝弟猶吾弟君家更幾家情知思棣萼愁與對椒花酒  
罷看參遠燈寒望斗斜相憐謝池草明日又春華

戴生在吾語感秋思歸詩以慰留之二首

到日中元節淹留歲漸微而翁在異縣知汝苦思歸旅  
館空彈缺秋風未授衣敝床還可宿暫住莫相違

二

二十年方妙昂藏見爾才青雲滿霄漢黃鵠尚徘徊寶

劔休輕試家書莫屢開百年深有望吾道豈塵埃

答汝忠

俱向滄江起同懷魏闕情乾坤尚戎馬我輩復簪纓  
羽棲雲閣聯翩入鳳城誰知薦賢內今日忝齊名

夜過川甫

日午詩相約更深馬獨來慚非問奇客知是草玄才  
月析楓烏起霜燈竹戶開因思高李輩詞賦擅梁臺

九月二十五日會曹汝學侍御于麓堂夜歸遂

過侍御宅

東閣留樽罷西臺夜過時  
題詩倚驄馬換酒脫金龜  
菊院霜天靜楓城海月遲  
向來秋寺約還許赴佳期

冬夜過飲戴時亮進士

琴酒楊雲宅談玄靜夜真  
庭無旋馬地空有聚螢人  
霜霧生陰井風燈動夕鄰  
喧喧萬車馬日出自紅塵

徐子容見過

三月三十日燕京春興悽  
相過話遠別此去憶深棲  
江

漢今舟楫乾坤尚鼓輦風塵歸未得送汝萬行啼

與王宗哲過訪劉德徵無有所懷

天街並馬過零雨碧氛氲王子真乘興劉郎雅好文  
燭筵揮玉軫風戶裊鑪薰忽憶橫簫客遙隔彩雲

端陽日過子容登瞻辰樓

五日訪南州瞻辰上北樓旌旗夾水殿簫鼓送龍舟  
滄海猶多難佳辰但百憂浮雲暮南遠遙向楚江頭

九日顯靈宮宴集

九日無風雨賓朋更遠來菊花催酩酊仙侶得追陪  
眺迥山河出登高殿閣開攜遊有諸妙詞賦豈吾才

登紫極閣

層閣重重麗丹梯裊裊孤風雲上紫極氣色覽皇都苑  
靜芙蓉落城喧鴈鶩呼蒼然見淮楚鄉思滿平蕪

侯郎中劉主事見過對菊

菊樹開初爛軒窗坐晚晴客非先有約花亦太多情  
霜艷娟娟靜風香細細生天涯一盃酒今夕對寒城

過君采次韻二首

海內風塵隔天邊  
江漢流昔牽春草夢  
今並玉珂遊神駿  
元千里仙人自十洲  
慚隨燕雀輩  
白髮世間愁

二

自君來此地  
謂我頗同流  
復往江湖去  
寧忘霄漢遊  
龍蛇蟠海曲  
鴻鴈向河洲  
從此風波隔  
長安日暮愁

世其宅夜集同君采作限難字

冬夕具盤餐  
明燈坐不寒  
獨憐竹葉盞  
仍對菊花團  
素

月縈窻細高雲傍苑殘美人江國去惆悵采芳難

秋夕同蕭執夫舍姪士飲

把燭開塵榻幽尋款夜扉寒城颯欲暮風葉坐來稀  
野興林間竹鄉心楚上薇蕭條共盃酒潦倒愧朝衣

除夕劉戶部宅

畫省開雲幔西堂對雪峰一年惟此會萬里幾相逢  
守歲親燈火朝天候鼓鏞江湖有岐路漂轉嘆萍蹤

晚過以行



伯兄難更見愛弟復佳名往日題詩客黃昏駐馬情春

星度北牖暮

一作舊

雨到西城腸斷池塘草東風亦自生

顧九和內翰約看花城南寺病目不赴

不赴城南約遙傳寺裏篇看花吾未老出郭偶無緣簇  
馬低春日啼鶯隔彩烟風沙開病眼愁向艷陽天

遊郭氏山亭

舊日追遊地新年此度過庭春歸雪篠洞古發烟蘿遲  
日登臨倦名園感慨多風花騎馬去須放酒顏酡

九月四日劉子見過二首

入閣開塵榻留尊對苑牆  
杪秋餘暑濕高樹獨風霜  
歲逼鄉心甚天增病骨涼  
自憐情興減不比向來狂

二

汝病稀相見高詩久不開  
側思金石奏喜挹蕙蘭芬  
細菊妍霜晝繁砧亂朔雲  
蕭蕭秋日興對爾憶離羣

九月五日與張劉崔三子約九日遊法藏寺塔  
劉嘗約遊西山竟寒盟故云

未省重陽菊誰邀我輩看城南有塔寺共擬集衣冠雲  
起登臺興風追落帽懼此盟今夕定莫似碧山寒

登塔二首

古塔層城畔秋毫萬里看登高攜賦客落日眺長安天  
地懸相抱江山鬱自盤誰能絕頂上不避北風寒

二

塔廊徐暗轉不覺此身高月牖通天漢風簷散海濤望  
餘秋色遠登罷客心豪去鴈休回首冥冥一羽毛

訪客鑑公房

病客依棲地石房鍾磬深清齋忘肉食獨宿見禪心  
閣日斜寒晝窻雲下夕陰吾居亦鄰並日為過西林

齋宿大興隆寺

疊雪霾雲磴陰霞絢石房沉冥通別理宴息對焚香  
暖色含初篠遲烟散遠楊齋心臨暮景屬意向春陽

春日劉薛二子過

林花寒不拆城鴈日喧呼壯覺風情減春增旅興孤  
經

過留翰墨潦倒念江湖未似高陽侶垂鞭向酒壚

再過玄明宮

朔海風雲變玄宮日月移登臨逼九日搖落倍前時翠  
竹寒虛寢荒藤蔓曲池重看石槲地徒有雍門悲

九日登仁壽寺後山

石閣凌香岫憑高烟霧開人疑送酒客地即望鄉臺鴈  
度桑乾去雲從碣石來魚龍瀚海北萬古一悲哀

十月望夜劉薛二子過對月

院寒冬月白城夜海雲收上客扳蘭省清光近鳳樓關  
山一北望河漢迥西流未見乘槎使迢迢上斗牛

九日登慈恩寺閣三首

不到慈恩久今來九日期天寒鴻鴈少秋晚菊花遲搖  
落悲風雨登臨感歲時牛山何處是異代獨興思

二

地幽人跡少僧至掃莓苔閣迥湖光入林昏雨色來登  
臺憐作客入賦耻非才何事臨佳節秋懷未肯開

三

莫引憑高目蒼茫海色遙秋空波瀾瀾寒日樹蕭蕭關塞俱搖落音書久寂寥天涯有兄弟猶滯楚江橈

自滇蜀歸李戶部馬舍人見訪

官舍掃莓苔故人尊始開相違頻問訊乍見各徘徊瘴癘一身在風塵萬里來欲詢滇蜀勝慚愧子長才

雨中過李真人方丈二首

勝地豈常得幽盟難重尋清晨驅馬出聊此息塵心鳴

磬秋堂濕然燈古殿深吹簫愛仙侶縹緲隔珠林

二

層臺暮雲外寂寂羽人居積雨堦除靜含風殿閣虛洞  
中留白日窻下寫丹書即此觀幽逸能令世慮疎

早入宣武門

藹藹名都會鷓鴣共接翔金貂萬戶客鐵騎五陵豪夾  
道紅塵滿千門白日高寂寥楊子宅隨分守蓬蒿

望海



登高望遠海萬里一長吟島嶼迎寒日波濤帶夕一作積

陰豈無乘筏嘆亦有釣鰲心去去從吾好三山烟霧深

中秋夜集呂給事宅

銀漢高秋露嚴城月色陰美人今夜酒遊子故鄉心烏鵲江邊去蛟龍海上吟漢宮樓殿迥莫使暮寒侵

與韓汝慶行歸長安望月

中秋高宴會客散向長安皓月千門裏青天並馬看明添花藥亂陰益柳條繁悵望高雲上何由振羽翰

晚過周進士言別聞琴

朱絃久寂寞此夜拭瑤琴坐對燕京酒同悲楚客吟城  
高下木葉樓迥上秋參別後清江夜遙思絕代音

與孫世其過張秀才

長夏稀朝謁相邀此地同占晴行苑外避暑出城中翠  
篠含風靜蒼波映日空因思共童冠歸詠舞雩風

與孫戴張三子納涼

薄暮攜三子追涼步短宵水邊低出月樓上忽橫簫久

露花沾濕微風竹動搖醉歌聊永夕坐待紫宸朝

避暑存上人方丈

燕地炎蒸月西林大道傍上方留避暑長日坐焚香細  
竹軒窻靜高雲殿閣涼何時更乘月過宿贊公房

出遊功德寺

昔聞功德寺今出帝城西晚日丹梯近秋天翠巘齊荷  
衰猶一作斜映水樹古曲盤堤十里經行地清沙送馬蹄

宿洪公方丈

落日罷登臨禪房秋坐深不妨留枕簟聊得謝冠簪樓閣湖天影松蘿洞月陰明朝又朝市回憶碧山岑

天壇沈道士觀中

夏日天壇上登臨傍九霄川原一以眺樓觀鬱蒼堯洞口逢丹侶花間醉碧簫清沙日色盡翻恨馬蹄遙

張子純宅對月

長安今夜月留客此堂開影落清樽裏光從玉殿來苑花添悵望鄰笛助悲哀幸接仙郎飲高歌愧爾才

病居田給事中夜過

卧疾春天暮相尋客夜幽  
劇談翻愈病沉醉忽忘憂  
西月低臨牖明星遠動樓  
看君上馬去猶使興情留

春雪諸翰林見過二首

正月燕京雪飛花落滿  
筵輝輝映旭日脉脉向  
春天苑草寒猶細宮雲  
晚更鮮中原有戎馬何  
日凱歌旋

二

冉冉烟城裊飄飄苑雪過  
人稀春夜靜花劇暮寒多  
置

酒邀金馬開軒對玉柯陽春有高調莫惜為予歌

酬盧侍御見訪有作用韻

柱史事沉冥行驄到我亭數章天北極隻字斗南星坐  
久鶯初喚吟餘草更青朱絃山水調淒切為君停

同張仲修再過劉子

劉家好兄弟鄰近苑西樓數有花辰會無成月夜遊留  
徐還下榻訪戴不迴舟況接張公子詩輕萬戶侯

過田郎

晚就田郎飲高歌坐此庭炎天忽雲雨西日更雷霆  
席傍簷花濕窻臨苑樹青相過戀朋好常得慰飄零

同崔太史張侍御飲周都閫亭子

公主山亭在元戎小隊回碧沙霑細雨白日映輕雷  
已並花邊駿難孤竹下杯良宵可乘興歸騎

一作蓮漏

莫頻催

郭氏園亭

漢苑清霄近名園不出城曲穿陰洞入危傍峭岩行  
賓客冠簪盛公侯甲第榮日斜登覽罷悵望有餘情

過孫世其時有警報

一自來京邑常時過爾吟飄零嘆往昔留滯到于今各有江鄉思無之邊塞心明星罷擊柝悵望北城陰

過遠夫

堂上炎天迥明燈夕坐深相逢濁酒醉獨悵白頭吟苑柳通西內邊烽起北岑此時對遷客何意復冠簪

出閣過勤甫省中

竹垣通左掖花省接仙郎並坐停杯晚高談卷幔涼水



陰沉紺殿山影落雕牆愧我同朝客傳君寡和章

立秋日呂景二內翰呂田二黃門見訪

高城下一葉亭榭已蕭疎河漢生秋早星辰動夜虛玉  
珂停騷裏金硯落蟾蜍俱是文章伯相看我不如

再遊郭氏園亭二首


仲夏一到此主人開水亭園林再駐馬臺榭已流螢細  
竹搖風牖孤雲度石屏停杯更暮雨何限北崖青

二

日暮北亭上，悵然秋望深。  
碧山聊拄杖，滄海未抽簪。  
苑上開雲閣，窻中疊霧岑。  
長安足塵土，常過此登臨。

過顯靈宮

不到玄宮久，桃源更此行。  
行知瑤水近，坐望赤霄平。  
洞草秋先長，壇雲晝自生。  
雙雙玉簫發，風引度仙城。



大復集卷二十

欽定四庫全書

集部

大復集卷二十三至

詳校官中書臣孫溶

中書臣劉源溥覆勘

總校官進士臣繆琪

校對官中書臣袁文邵

謄錄監生臣李傳燮

謄錄監生臣李逢堯

欽定四庫全書

大復集卷二十一

明 何景明 撰

五言律詩八十一首

十四夜對月集陶良伯

陶令堂中月深更酒為攜金波流未滿白露迥含淒鴻鴈秋江北芙蓉漢苑西一杯同悵望萬里各羈栖

十六夜月集侯汝立

秋月尚不減客堂清宴闌把盃看玉兔駐馬簇金鞍漸

覺歲時暮况驚關塞寒霜笳中夜發葉落滿長安

夜集勤甫宅時秉衡至

同鄉耽宴集浮歲感飄零况復故人至相邀明月亭  
琴清繁玉露坐久密秋星從此異佳貺無忘瑤草青

同崔子鍾過董文玉宅

崔生亭伯興董子仲舒才不為相鄰近那能數往來  
霜天留把菊風檻促行盃尚憶秋參落酣歌送我回

十月四日過良伯

古堂秋色暮霜晝靜煙沙鄰並常盃酒寒天尚菊花流  
雲行苑細返景抱簷斜隼鴈南翻去飄飄各念家

夜集世其次戴子韻

醴酒燕京夕朱絃楚客心情親不覺醉慷慨豈忘吟哀  
析霜天迥藪篁雪館深江湘舊行地何日更南尋

正月四日同子純過劉汝忠次韻二首

並轡來仙第深盃好共揮遠天初夜色新月更春輝燈  
夕看相近花時會莫稀雲霄望羽翼真喜接高飛

二

邂逅憐新歲，朱絃為客揮。  
春風歸柳色，月夕助燈輝。  
歌酒三人共，乾坤一笑稀。  
看君俱妙思，操翰忽如飛。

顧以行諸客見訪次韻

海內朋簪盡，天涯意氣親。  
雪峰斜暮景，霜草勁春容。  
夕留尊久仙，曹染翰新諸君。  
千里駿霄漢，迴風神。

人日齋居過王德徵

齋居春晝冥，獨過子雲亭。  
雨雪逢人日，江湖問客星。  
望



來花漸發愁劇柳還青更話東歸棹遙遙海思停

立春管汝濟見過次韻

勝日高人過蓬門氣色新青榆初改歲白蒿共嘗春鼓  
吹闐京邑樓臺接漢津扳留慨時序晤語覺情親

寺中張子言自浙來話

石閣晴雲抱花宮夕漏催我遊天姥夢爾向海門迴日  
月雙龍劒乾坤一酒盃山中問百草早晚拆春雷

夜過劉以道兄弟

風燈懸岸館竹色靜春沙山水停湘瑟池塘到謝家雪  
融花尚細烟裊柳初斜對酌情親夜能無戀物華

過城南寺

出城春漸近到寺日猶高野望增樓閣沙行散竹桃吏  
情雙白鳥世故一青袍苦被微名繫乾坤無地逃

過以道喜其弟以正至限韻得衣字

美人今夕酒行子暮春衣常念賢兄弟經年望爾歸喜  
占烏鵲噪愁慰鵲鴿飛謔浪相逢地銀缸照益輝

出遊城南寺

樓閣倚清沙春尋

一作深

景未斜聽鶯到竹院並馬入桃

花不倦登山屐猶遲泛海槎芳樽爛熳倒吾醉亦忘家

王壽夫過分韻得吾字

自別君昆弟同遊獨愧吾十年常道路萬里各江湖乍  
見形容異相思夢寐俱向來飛動意執手五雲衢

清明日同諸友遊城南寺

風晝人遊少沙郊馬並行穿花尋野寺冒雨出春城骨

肉新傷淚賓朋遠至情天邊有芳草故向客愁生

子純邀過東鄉

朝回聞折簡騎馬過西隣把酒對今雨看花逢故人雲  
陰初薄暮鶯囀尚餘春向日江湖夢飄零見爾頻

亮公房雨後

夕宿西林院蕭蕭竹樹分風雷迴驟雨星月度微雲  
色空中減名香靜處聞早知禪可托未忍去人羣

城東泛舟

水郭移尊宴沙原列騎停岸開平放舸林轉曲通亭雨  
意雲垂白風情柳送青衣冠夕臨泛東望極滄溟

懷麓堂集將遊東園以風雨遂止二首

仲夏陰晴半林塘水石隈窻雲開遠色簷日度輕雷雨  
阻東山屐天留北海杯門牆接苑樹長晝得遲迴

二

東園春餘麗西亭晝不譁雨來留聽竹風起罷看花堂  
是裴公野庄仍李相家庭堦有碧草早見茁蘭芽

李川甫戴時亮過訪

豈是高人室能勞二妙來  
炎天雷雨豁深院鬱蒸開  
改席因風樹留尊對晚苔  
高吟俱感激琴罷轉餘哀

暮雨劉以正過飲

驟雨暮不止轟雷昨夜奔  
炎蒸三伏破風霧二儀昏  
欸客深投轄寬愁細倒尊  
秦川與楚塞留滯兩鄉魂

鑑上人房訪太和兄飲

雷雨思炎月塵沙苦冀方  
久拚河朔飲今醉雪山鄉  
蘿

月搖丹牖松雲抱石堂  
憐君依宿地棊簾轉清涼

同川甫寺中避暑

偶到清涼地  
番思苦熱哀  
水堂菡萏折  
風殿薜蘿開  
逃暑無三伏  
憑虛有一臺  
西山晝雷雨  
不見洗天來

同李川甫鄒子家過張子言舍

白晝風雷過城波靜碧沙濕雲翻  
抱暑西日半籠花元禮舟堪並  
鄒陽賦更嘉同遊仲蔚宅杯酒重  
年華

訪子容自荊州使回二首

使節荆門返文章楚郡傳綵雲神女賦斑竹帝妃篇弔  
古南遊日憂時止上年停盃問世事轉眼幾回遷

二

下馬逢今雨東堂覓舊醅入秋翻暑濕過午復雲雷花  
已經年放人今萬里迴世情吾懶道但飲莫停盃

雨中劉汝忠過對棊觀詩談邊事作

城晚客居靜邊秋代馬多黑雲浮日動白雨映天過謝  
傳惟棊局劉琨只嘯歌異時安見汝談笑却干戈



中秋十三日子容樓

對酒中秋日憑欄萬里遙風高塞國鴈月近海門潮興  
逐燕歌起魂從楚望銷無邊漢宮柳烟色畫蕭蕭

十四夜李川甫宅

獨院淹杯酌高秋驚旅魂風蟬急白露沙葉靜黃昏月  
上看天柱潮來望海門平生壯遊志非爾向誰論

十五夜劉子緯宅子靜初至對月

長安今夜月復滿桂花輪笛裏三年淚尊前萬里身關

山上雲霧樓閣下星辰况接離羣友悲歌對愴神

過宗哲故宅

過門猶宿昔駐馬復誰留雨院殘春竹風庭折晚榴還  
家無二頃歸櫬有孤舟日暮隣人笛淒然涕淚流

八月二十八日子容過對菊

近節逢花放開尊集異鄉乾坤共一笑風雨似重陽誰  
識暮蟬意獨憐秋樹芳它時益爛熳邀爾醉西堂

九月一日過劉氏昆弟對菊

謝庭看朔菊楚客醉燕邦瓊樹元相對金花亦自雙霜  
雲陰夕院燈火燦秋牕待到重陽日還來倒玉缸

汝濟夜過同以行對菊

揺落相過地芳菲晚更親酒醺留媚眼燈色笑生春風  
雨新晴夜江山未老身百年如不醉恐負此花神

同許補之劉子緯登定州塔

塔閣盤空上笙簫遶洞行懸梯出萬井飛蓋俯孤城燕  
岱風雲色滹沱鴈鶩聲登高並回首直北是神京

夜集錦夫同本貞限韻

萬里同鄉友飄零嘆此逢江山饒涕淚歲月老形容風  
散城邊角雲傳海上烽中原尚格鬪未可問雲松

繡水晴瀾

獨憐繡溪水却出錦屏山岸夾桃花浪沙明碧石灣泛  
霞開潏灩乘月弄潺湲千載高人去誰來釣此間

以行自西山還相訪

聞汝西山去題詩十日還獨行翠微裏應到玉泉灣石

壁雲孤裊冬巖菊自斑烟霞發妙思高詠眇塵寰

夜歸昌化寺

日落歸山刹松風處處聲幽深不易到昏黑更多驚  
斷尋溪入峰迴截嶺行茲遊藉朋好奇絕冠平生

平坡

晚眺平坡上蒼茫萬壑前一僧行樹杪諸客到寒天險  
駭將崩石清憐乍坼泉翠華公主塔縹緲碧山巔

圓通寺

曉問圓通寺青山拄杖尋飛梁  
裊石澗寒日抱霜林殿閣攀躋遠  
關河眺望深下看孤鳥翼萬里送  
遙心

仁壽寺

塔廟開龍象叢林會法筵散花金  
布地拄杖石飛泉漂泊登高興依  
棲習靜緣北風吹袖起昏黑下諸  
天

詠天寧寺塔

七級芙蓉起千年舍利藏地形標  
海嶽人代閱隋唐鏡現三天象珠  
含四日光白毫空萬里處處有迷  
方

菊莊

吾憐陶處士瀟灑出塵埃  
白髮秋逾短黃花晚自開  
百年常對酒九日漫登臺  
却顧輪蹄者悠悠徒爾哀

大功德寺

寶地烟霞上珠林霄漢間  
宣皇留殿宇今日共追攀  
御榻臨丹壑行宮鎖碧山  
帝城看不遠時見五雲還

玉泉

行遊金口寺坐愛玉泉名  
雲去隨龍女風來動石鯨  
入

宮朝太液穿苑象昆明却望天河水迢迢萬古情

望湖亭

獨上湖亭望霜空萬里明檻疑天上立槎是斗邊行雲  
霧開山殿芙蓉暗水城先朝四百寺秋日徧題名

慈恩寺

海子橋西寺高樓御苑花中流自日月平地有烟霞客  
至開金殿宸遊想翠華十年復到此朋輩各天涯

一舫齋



乾坤聊一舫高卧此齋深竹散琴書色窻開島嶼陰乘  
桴浮海意擊楫渡江心無限風波裏何人嘆陸沉

鏡光閣

峻閣岩峩上層城眺望中風鈴齊送響雲磴曲盤空海  
色搖窻碧蓬萊影日紅翠華無復到長鎖翠微宮

關門

虎衛關門迥龍沙塞曲深風雲時有氣日月晝長陰中  
使西來訊千官北望心天寒漢宮闕翠盖憶春臨

寄題蒼谷寺

曲水盤山地松門路不分  
青天望嵩少白晝吐風雲  
過客空高興徵君自有文  
霜鍾翠微裏日暮渺相聞

鑑公房石鐙

石盃何年鑿瑤燈此夕然  
雲流自五嶽月色近諸天  
定裏金輪轉光中玉鏡懸  
西來不滅影常照法筵前

張侍御仲修送弓

繡服意相親彫弓把贈新  
獨憐投筆志未老據鞍身  
晝

控鳴風鎬宵鸞抱月輪倚天時一望西北有邊塵

新鄭道中

客路臨新鄭雲沙轉望平夕烟生斷塹野水入荒城下  
馬看碑誌逢人問地名千秋陵谷在懷古亦多情

淇門

何處問商圻荒原尋斷碑鷄鳴深市井鴈入古城池斜  
日人空吊浮雲世自移祇餘淇上竹綠色映寒漪

銅雀臺

美人望陵處無復翠華過殿冷閑歌吹宮春罷綺羅落  
花嬌靨盡芳草怨魂多日暮漳河水東流空白波

壽鄺廷瑞太守

五馬歸來日閑身六十強春花自爛熳雲水共徜徉邑  
種萊公竹邦留召伯棠平生天下志白首付滄浪

初度

此日吾初度深盃且自揮眼看兒女大身覺弟兄稀未  
得浮滄海徒然傍紫微齒年今不小心事已多違

秦翁輓章

不見此翁起誰尋處士家邑人傳月旦萬里慘霜笳水  
面藍田月春殘清渭花隴雲深一墓寒月晝空斜

輓謝晚耕

五十不入城獨吟稱晚耕日南提劍志海上却金名故  
里松猶在秋田草自生江湖夢顏色悵望有餘情

輓謝中丞

閩海通南極三山產異才循良三厯郡鎮靜久登臺神

鬼愁先見黔黎望復來誰看大星落天柱使人回

吳中丞雙輓

近讀中丞傳兼聞節婦吟死收銅柱續生有栢舟心滄  
海空潮汐青山自古今雙魂俱不泯何恨九泉深

海嶽陳翁輓章

白雲送秋老一墓海門邊花憶啼鶯日風悲種樹年人  
間餘翰墨天上有神仙從此遼東鶴千年更一旋

百戰

百戰將軍死中原將士哀山河猶汗馬霄漢已雲臺敢  
料安危勢須還節制才南征聞日遠消息幾時來

觀兵二首

將帥俱分閫朝廷再剖符選徒皆虎士戰馬盡龍駒直  
指黃河外長驅碧海隅感恩須此輩萬一為捐軀

二

組練回天地戈鋌白日搖王師一奮怒寇賊可潜消使  
過傳金節軍行奏玉簫人言漢家將今是霍嫖姚

諸將

萬方皆寇盜諸將半公侯未息蒼生困猶煩玉食憂珥  
貂前日賜汗馬幾時收莫倚兵車力安危在運籌

防寇

萬國猶防寇三年未罷師天清聞鼓角野曠見旌旗岸  
雪晴含照山雲晚趨姿孤臣北上日想望太平時

盜起

盜起從畿甸徒勞將帥心徵兵搖白羽募士散黃金天



地河嵩隔風塵海岱陰萬方吹盡角此曲淚沾襟

花當

聞道花當種緣邊部落遙百年為漢衛每歲款天朝  
犯順若無敵背恩誰爾驕側想文皇日龍驤親渡遼

內直遇雪

裊裊城雲影蕭蕭急霰催遠從仙閣度輕繞鳳池迴  
弄日搖彤管含風引玉杯春還今歲早先報漢宮梅

入朝遇雨

躍馬天街霽趨朝冷色催好風先北起微雨自東來柳  
拂重城鎖花籠複道迴萬方憂旱日沾灑望蓬萊

將雪有懷

長安十萬戶騎馬欲何之已動尋梅興空成采葛詩雪  
心知霰集雲意怯風吹今夜西堂燭蕭然有所思

冬月

冬月少光輝霜天影漸微鼓鼙仍雪塞燈火自風扉水  
凍蛟潛泣沙寒鴈不飛何時漢家將雙照羽旗歸

秋雨

斷續城頭雨空齋綠蘚封孤燈聞過鴈四壁起鳴蛩細  
草傷心碧幽花滿目濃美人居綺陌幾日一作惆悵不相逢

十七夜月思

秋夜已如此美人安在茲含顰向玉魄揚采憶蛾眉  
娟芳香歇盈盈白露滋河關悵伊阻誰復訊佳期

大復集卷二十一

欽定四庫全書

大復集卷二十二

明 何景明 撰

五言律詩八十一首

雨雪曲

蒲海雲成陣  
天山雪作花  
長城烽火入  
邊騎動鳴笳  
霧深迷漢月  
風起暗邊沙  
一夜關河冷  
征人盡念家

星變

星變干常紀  
花開與令違  
九重方避殿  
四海望垂衣  
賦

歛何時緩流亡幾處歸廟堂圖至理早晚答天威

冬月

冬月今宵滿他鄉此夜情城高初影堞樓靜故當楹霧  
濯寒輝苦風吹夕暈生捲簾愁不寐庭樹宿鴉驚

月食

月蝕中秋夜中天萬國看衣冠連大內鍾鼓動長安光  
沒天河曉陰沉渤海寒聖心應念此長望五雲端

九月十五夜月

萬里高秋月青天此夜看  
乍流關塞影遙出海雲端  
浙開風幔輝輝傍菊欄  
清笳奏城闕為報漢宮寒

中秋無月

月賞今年罷高樓獨客愁  
關山中夜笛江漢故鄉舟  
暗雨捎簷入秋螢度檻流  
應知雲霧上天柱有人遊

六月望月食

未月黃衢厄妖遮赤道行  
魄殘疑近晦食甚始生明  
奏鼓風颺慘登壇雷雨清  
攬搶猶未掃天意豈休兵

元日

元日王正月傳呼晚殿班千官齊鵠立萬國候龍顏辨  
色旌旗入衝星劒珮還聖躬無乃倦幾欲問當關

五更

五更霜雪霽忽夢紫宸班天上傳鍾鼓風前想珮環鷄  
鳴無復詠馬動亦虛還憶在先朝日朝朝見聖顏

三月三日

病眼看天地風沙當晝吹賞心孤酒伴行樂過花時水



曲蘭芳靜城陰柳絮遲東郊有車馬春色報人知

秋夜

暝砌凝寒色高樓閉綺櫳露蟲吟蟋蟀風葉下梧桐此  
夜關山月何人悵望中冷然感秋思况復聽征鴻

元夕

燈火萬家歡高樓玉漏殘舞留華月緩歌裊綠雲繁雪  
郭春初霽烟城夜不寒畫橋垂柳外遊女珮珊珊

十月一日二首

今日孟冬朔輕烟澹曉暎北風飄一鴈寒氣入千門消息斷行客關河迷故園浮生元不定俯仰任乾坤

二

嚴霜淒卉木茲歲忽將周寂寂龍蛇蟄寥寥江海流暮燈喧巷哭風角起邊愁不盡中原望難尋萬里樓

歲晏

歲晏看人事蒼茫繫所思浮雲當日暮積雪見春遲報國元無術寧親未有期獨憐張內侍吟絕四愁詩

中秋

風塵悲海內，滿月對長安。  
聞道王侯第，中宵晏未闌。  
過雲催玉管，生水弄金盤。  
獨念南征將，關山此夜寒。

三月三日

三月正三日，長安春可哀。  
鴈從南國至，花向北人開。  
戎馬中原地，鄉關萬里臺。  
蹉跎嘆物色，容易歲年催。

清明日病懷

旅舍清明日，長安新火烟。  
桃花轉愁思，竹葉興蕭然。  
客

病閑官馬囊空澁俸錢故鄉聞稍定南望好林泉

謝崔太史惠菊

遺我高庭菊懷君秋樹林香添竹葉盞色助草堂吟翠  
蓋翻風檻霜天倚玉簪晚芳如不歇可比歲寒心

觀荷

入院高荷密留尊菡萏遲絳房扶水萼翠蓋倚風枝檻  
坐明星夕窻過驟雨時流螢點點度故傍綠陰池

寺中吾子館海石榴

西林雲晝靜，覆院海榴花。坐映東窗下，疑窺鄰女家。枝  
枝搖綠水，片片落丹霞。錯比珊瑚樹，光輝逼一作開日華。

汝慶宅紅菊二首

紅菊開時暮，亭亭冠物華。亦知顏色好，不是艷陽花。羅  
綺嬌秋日，樓臺媚晚霞。清香如不改，常傍美人家。

二

秋花何太艷，綠盞慰飄零。笑比西施醉，愁憐楚客醒。雲  
高開爛熳，烟細裊娉婷。好為多沽酒，頻來倒玉瓶。

沈道士館牡丹

仙亭牡丹樹不數玉山桃  
忽漫相逢處開花爛熳高彩  
雲停度曲遲日動揮毫  
明歲天壇路春風憶錦袍

雨中紅芍藥

百花堪獨立一雨更風流  
日暮行雲女仙裳覆楚丘  
明添丹臉淚暗抱錦心愁  
晴晝猶須賞何人駐紫騮

長安柳

三月長安柳春風吹暮天  
花飛御溝水葉傍漢宮烟  
繞

岸猶堪折臨流更可憐故園無限樹零落戰場邊

芍藥

城中芍藥徧席上把殘枝上苑相看日春風爾較遲艷  
歌翻錦瑟酣醉倒金卮南國今開罷園亭數夢思

觀竹

相國西垣第新看種竹成葉香鳴鳳宿根古蟄龍生雨  
洗琅玕色風傳竽籟聲山林輕肉食心迹喜雙清

魯山院竹

泰公堂下竹覆地長新篁雨颭春牆碧風含石室涼經  
行留下榻晏坐對焚香遺響流笙鳳時時落上方

聞鴈

見汝今南下憐予一望家亂聲求侶急高影背人斜月  
靜林無葉雲寒菊有花萬行關塞淚秋日墮悲笳

鸚鵡

不恨金籠閉其如鐵鎖牢側身燕雪苦垂翅隴雲高豈  
為能言語番令妬羽毛角鷹何猛氣翻掣錦鞵絛



春鴈

花初背楚澤雪罷度桑乾  
漸起隨春色高飛犯朔寒  
書停江國望陣倚塞門  
看憶爾常南北無嗟行路難

鴈

唳唳邊笳怨飄飄南鴈翔  
長風度關塞九月下瀟湘  
積水浮連影遙空起斷行  
故園秋望盡聞爾淚沾裳

聞鴈

鳴鴈南方去人今北地  
聞水寒沉塞角沙暮起  
秋雲獨

叫如求侶相呼恐失羣  
高樓潛望爾鄉思轉紛紛

麋

碧山誰放汝華館故相羈  
野性看人駭閑身顧影疑  
草香春過處花暖晝眠時  
無限雲林好樊籠祇自悲

蘇子遊赤壁圖

垂老黃州客高秋赤壁船  
三分留古跡兩賦到今傳  
落日寒江動青天斷岸懸  
畫圖誰省識千載尚風烟

彼美東隣子

彼美東隣子花間白日醺纖腰人不見妙曲轉愁聞舞罷空明月歌餘尚彩雲章臺楊柳樹花暮落紛紛

雪夜九梅翁園同蒼谷宴集二首

郊城風雪夜騎馬叩誰門乘興寧迴棹寬愁數倒尊  
茆堂開洞壑楓岸疊沙村朝市山林意非翁未易論

二

冬夜南園集携遊興未窮登臺望積雪下嶺逐迴風  
駿愛林中馬冥思海上鴻不因蒼谷子誰識九梅翁

到鄠簡王敬夫

以下秦集

杜曲花無數城南柳更重去天惟尺五隔歲一相逢雨  
過春陂水雲開紫閣峰好陪王學士杯酒日從容

同敬夫遊至華陽谷聞歌妙曲

名邑今重過終南第一遊山中白雪倡天上綵雲流柳  
散秦川色花含杜曲愁同時霄漢侶十載卧林丘

過康子德涵彭麓別業

不求金馬召翻愛碧山棲柳色閑門閉桃花曲徑迷酒

船時問字翠壁有留題只此林泉好無煩到許西

荅張道夫都閫病懷

不到將軍第秋清病起遲誰知平子後復有四愁詩月  
幌臨書帖風庭掩戟枝東橋好山水何日赴幽期

九日同陳侍御鳳谷登宴

栢臺驄馬使蘭谷鳳仙家暫駐三秦節來看九日花風  
霜高錦樹雲日麗清沙去去層霄上回瞻北斗斜

送閒雲子還河內

爾西訪崆峒東隨河上公神仙自有友不與世人同王  
屋留雞犬天壇躡斗虹白雲從此駕去去入無窮

卧病簡汝濟士奇時濟二首

卧病常遲起焚香獨燕居聊因謝簿領暫得弄琴書嶽  
色盈虛牖泉流遶暗渠雖然官府內不異在林廬

二

習隱開三徑耽幽構一齋吏人稀到戶鳥雀自馴堦藥  
補身差健詩成悶強排同聲二三子不見好音來

過馬谿田村居

宛宛清河曲團團翠竹村  
卧龍元勝地容駟已高門  
野曠嵯峨出天寒雲霧屯  
何時還過訪無限欲相論

冬夜過仲木

漢殿詞臣第秦川處士家  
過逢遙慰藉文翰轉光華  
夜興山陰雪春情渭北花  
江湖望霄漢相對一長嗟

寄彭幸菴中丞

山海藏身遠朝廷屬望頻  
駿功收戰伐龍卧偃經綸  
星

宿黃河氣風雲華嶽神生才元有待終起慰斯人

贈張時濟陳伯行胡承之周少安三月三日出

城遊宴

芳筵開上日才子出京華暫別含香署俱停訪石槎秦  
川平對酒漢苑曲穿花應共題春草相過謝客家

送張行人賁大行皇帝遺詔使秦蜀

我皇忽晏駕君行辭直廬九霄持使節萬里捧哀書湖  
望雙湖鼎橋回駟馬車錦城花滿樹爭識漢相如



清明日病卧聞三司諸公出城

伏枕花辰過閉門樽酒空賓朋臨水上供帳出城中柳  
色龍池雨鶯歌杏苑風秦川多勝事遊賞未能同

秦府進歷

寶歷頌天闕金樽宴錦軒萬年周正朔七葉漢宗藩向  
日冀堦曉含風蕙砌暄同懽承睿款歌舞頌乾元

拜將壇

漢主西封日淮陰拜將時壇場如往日朝代幾遷移王

氣風雲歇雄圖日月垂江山弔故國誰復見旌旗

秦嶺謁韓祠

捫蘿登峻嶺級石上荒祠雪阻南遷路雲停北望時  
文衰真有作道喪已前知千載經行地高山空爾思

登五丈原謁武侯廟

風日高原暮松杉古廟陰三分扶漢業萬里出師心  
星落營空在雲橫陣已沉千秋一瞻眺梁甫為誰吟

普緣寺有馬融讀書洞

春山尋古寺昏黑尚攀緣  
仄徑千盤轉巉崖萬仞懸  
虎常啼白晝猿忽墮青天  
欲訪名賢洞泠泠隔澗泉

書院課士雨至有作

雨色閒堂靜橫經坐晝深  
笙歌非絳帳絃誦有青衿  
竹勁捎簷碧松寒覆院陰  
萬人憂旱日洗耳聽秋霖

登樓鳳縣作

近訊中原使兼登萬里樓  
朝廷仍北極行在且南州  
峽斷風雲隔江通日月流  
如聞乘八駿早晚向崑丘

東河三月晦日

雨宿東河夜送春山館寒遠沙靄霧樹危石上風湍慣  
涉波濤險偏經道路難平生四方志回首欲求安

青峰閣曉霽

初日東峰上微微霽色分丹崖含宿雨青嶂拂歸雲候  
騎林端發鳴笳樹裏聞前山更可愛晴望碧氛氲

草店雨行

山館夏陰澹雨行寒色淒奔湍迴白石折坂下青泥棧

道常通北江流却向西千峰問來路烟霧使人迷

馬道驟雷雨復霽

萬壑驚雷起千峰鳴雨過稍看風瀨減更覺夏雲多虹  
飲垂青澗猿行掛碧蘿山中無吏事長嘯答樵歌

弘道書院

梁棟起層雲松筠散夕曛九巖瞻泰岱清渭接河汾冠  
蓋時時集絃歌夜夜聞登堂持節印衰薄愧斯文

咸陽原

千秋陵墓地駐馬惜茲行晚日登原殿晴天見渭城望  
春時極目訪古獨含情柰有咸陽草風吹歲歲生

草堂寺

昔讀高僧傳今看勝地形院寒留檜栢殿古落丹青寶  
塔叅遺影荒臺問譯經駐車春日暮散步出林垌

說經臺

西海何年去南山萬古存風雲留福地星斗上天門有  
欲誰觀妙無為自覺尊青牛不復返空誦五千言

普緣塔

石蓋凌空起丹梯出翠微雲從珠頂覆燈轉鏡中輝鴈  
沼波濤湧龍宮日月圍何能攀絕頂一覽漢邦畿

磻溪

丈人昔未遇垂釣此溪中不感風雲會誰知八十翁晚  
楓漁浦暗春草獵原空獨令千載下懷古意無窮

長春宮

夜宿仙人館晨聞鳳吹停玉牕開曉月丹井汲春星久

秘長生訣空留不死庭下山回一望巖壑杳青冥

益門

益門通漢沔棧閣上雲霄蜀道從茲始秦川望已遙生  
風鄰虎穴迴日過龍標耿耿征途子雲山誰見招

新開嶺

塹山通大谷槎嶺掛天梯倚一作獨立飛雲上回看落日

低異花千種色怪鳥百般啼晚就松林宿烟昏度碧溪

柴關



連峰入冥雨絕壁閃餘霞水認秦人洞林疑謝客家石  
門踐苔蘚源口覓桃花他日求棲息無言此路賒

武關

北轉趨劉垠西盤出武關微茫一線路迴合萬重山天  
地幾龍戰風雲惟鳥還關門鎖溪水日夜送潺湲

昭烈廟

漂泊依劉計間關入蜀身中原無社稷亂世有君臣峽  
路元通楚岷江不向秦空山一祠宇寂寞翠華春

鹿苑寺

即摩詰宅

舊宅施為寺青山屬野僧  
高人不可見勝迹已無憑  
色藉荒庭草陰垂古殿藤  
千崖一微逕異代幾攀登

過華清宮

冬

一作偶

駐華清殿千秋憶翠華  
青山無帝宅荒草半人

家雪下湯泉樹春回繡嶺花  
長安望不遠誰見五陵霞

望終南

近覽南山霽遙迎西日曛  
黛橫千里色花抱

一作挹

五臺

雲城闕行相映川原望轉分丹梯懸石洞未訪赤霞文

首山

王君首山下新起讀書樓雲霧懸蘿入湍波湧竹流具  
茨黃帝宅嵩少羽人丘想待功成去方為此地留

兩河口

東下商南路西辭蜀北門青山兩河口古戍百家村曲  
棧盤林杪危湍噴石根經過回白首蹤跡半乾坤

大復集卷二十二

欽定四庫全書

大復集卷二十三

明 何景明 撰

五言排律二十六首

上李石樓方伯

以下家集

三晉多人傑吾師出固然素汾經太岳紫塞入幽燕世  
業端居里名邦倚舜田由來天運復誰謂地靈偏郭相  
慚先達王通俟後賢明經超第一射策對三千感會逢  
昌紀登庸起少年劒鋒寒照雪辭藻麗生烟博物張華

讓才多子建憐八义迎客賦隻字使人傳豈獨文章貴  
還應器識全雄談飛玉露浩氣豁金天亮節唐元振英  
風魯仲連青雲仍自至黃鵠任孤騫簪筆星辰上持書  
日月前觸邪稱獬豸特立憚鷹鷂東觀臨晨入西臺薄  
暮旋朝回焚疏草吏散閱陳編百采班行整羣公禮數  
虔一年巡洛表兩命下秦川斧鉞威關隴舟船達澗瀍  
石林風淅瀝霜仗月嬋娟邊徼邊宵遁茅茨犬夜眠激  
揚弘憲度旌別布威權制作人文渙經行草木鮮闡幽

輝往哲訪古徧遺阡汲黯還辭漢張騫又使邊臺端堪  
秉節湖上且移旃城接三江樹波通七澤蓮蠻夷思已  
洽州郡役多蠲糾察元無隱焚囂肯自便駐車仁雨渥  
登座法星懸遠臬馳譽久當途薦䟽聯碧梧看鳳跼喬  
木待鸞遷分陝推公奭封侯得傅玄開藩臨宋苑張幕  
傍河壩位重心逾下名高守益堅薇花當省署棠蔭滿  
郊鄆聲價隆方鎮光芒動斗躔明堂求畫棟清廟想朱  
絃冠準真時望王公勸早宣麒麟功不朽金石頌應鏤

愚本蓬蒿質，那堪侍几筵。  
垂髫蒙引拔，撫志荷陶甄。  
附驥懷深願，登龍感夙緣。  
未除原憲病，空負樂生愆。  
舊業心常在，脩途步轉躔。  
鸞鳴猶待律，魚得敢忘筌。  
草野瞻飛蓋，雲遠望著鞭。  
臨風歌此曲，慷慨不成篇。

寄徐博士二十二韻

有美雲間士，才名洛下傳。  
逢時不得意，謫宦轉悠然。  
殊渥優文學，清階謝糾纏。  
班行亦霄漢，官侶是神仙。  
樓閣星辰麗，宮牆日月連。  
院桃紅爛日，闕檜碧參天。  
賈誼為



王傳陽城淑後賢諸生攻誦法六館藉陶甄玉序金鏞  
列虛廊石鼓懸雅音淒古調竒字索遺鏤劉向憂經術  
揚雄困草玄羅傷廷尉宅座嘆廣文氎魯壁藏書日齊  
門鼓瑟年青衿時涕淚學士盡奔遷鸚鵡愁金絡騏驎  
耻玉鞭客心千里鴈歸興五湖船上國同傾蓋長宵更  
接筵彩雲停翠管白雪繞朱絃悵別燕臺下淒涼楚水  
邊海鷗終浩蕩天馬自騰騫朋舊稀相見江湖益可憐  
因風問消息尺素幾時旋

寄邊太常

不薄淮陽守翻辭大省寮  
聯翩追近地奉引憶先朝  
碧落仙人館銀河織女橋  
漢儀瞻鹵簿虞樂典簫韶  
日月旂常動星辰劍佩搖  
聳身殊道路回首隔雲霄  
河內猶宜借山陰豈見招  
乾坤五馬貴江海一麾遙  
雅識懷金奏同遊嘆玉鑣  
歲年雙轂轉岐路一蓬飄  
鸞翮終難鍛鷺遷本在喬  
九苞應不遠覽德是何朝

復菴王公錦

斯人中土彥未老即重泉薦鶚推前達乘驄憶少年聲  
名起霄漢詞翰落雲烟志在身先退才高道亦全劍橫  
常自許寶棄復誰憐世業襄城舊孤墳汝路偏脩文應  
地下遺像儼生前未得瞻風槩空令涕淚懸

愚菴王公瓌

大夫元曠達襟抱絕塵氛香署星辰列清班鵷鷺羣兩  
都看宦達百寮重廉勤要地能知止危途耻策勲早投  
南郭隱不待北山文身向歸來健名從死後聞一官無

厚業諸子有餘芬  
鳴瑟哀梁木遺書落案芸  
風花虛館  
榭烟草自丘墳  
野路東流水空山  
歲暮雲九原長不起  
回首一懷君

雷

十月鳴雷動中霄  
萬壑哀初聞蟠地出  
忽覺遶庭迴  
夜水蛟龍聞寒山  
風雨來江濤  
何處折天柱  
此時推詎識  
乾坤意  
深愁號令乖  
攬衣還不寐  
坐望積陰開

雨後溪園卽事

偃息春朝宴輕陰散野園山雲行翠壁溪雨度河源鷺  
浴晴相倚鳬飛暖自喧踈楊映遠岸細草入平原開徑  
徒懷侶臨流且避諠豹終隨霧隱龍豈怨泥蟠鴻鵠皆  
千里雞豚自一村幽棲何限意難與世人論

中元節有感

去歲中元節朝陵百職同嚴趨神路左遙拜孝園東龍  
虎瞻王氣乾坤仰帝功未迴衡嶽駕空墮鼎湖弓啓兆  
龜圖順編年鳳歷終玉衣陳畫幄寶瑟闕玄宮北極猶

前日南薰亦舊風病若逢此日長望五雲中

九日

盜賊無休日憑高淚滿纓岷峨日悽愴江漢失澄清故  
國遺軍壁孤城傍敵營兵戈生朔氣鼙鼓入秋聲吹帽  
他時興登臺此日情賓朋共一笑俯仰異平生黃菊淮  
川晚丹楓楚岸晴蹉跎粟里醉憔悴澤中行近郭青山  
抱迴堤綠水縈長陰接遠甸短日背高城墟里孤砧發  
關河一鴈鳴臨觴憂戰伐對食想昇平元帥誰推敵尚

書尚用兵幽人獨北望疲卒舉西征秋圃芳菲雜閑門  
鳥雀盈垂蘿飄几席落葉裊簷楹夕竹捎烟勁寒花泣  
露明光陰玄鳥變湖海白鷗輕放逐寧違性棲遲且避  
名蒼生大臣在莫自涕縱橫

悼馬詩

并序

予家買得一馬齒小而良丁卯歲季夏十五夜予  
忽夢一龍子立堦下跼蹐而死夢警僮在戶外呼  
曰廐馬死廐馬死予怪且惜之作悼馬詩十韻

乘爾方踰歲何期病忽危  
四蹄猶未鑿雙淚泣長垂  
渥水千年降房星一夜隳  
早逢田子嘆終共塞翁悲  
顧影辭金絡遺骸戀敝帷  
詎能酬飼秣那復效驅馳  
首宿殘空樾莓苔滿故池  
風塵思駿力烟海失龍姿  
惆悵玄黃句淒涼赭白詞  
平生精志在不愧主人知

郊觀二十二韻

以下京集

今代園丘地天開壯麗區  
神祇二后配禮樂百王殊  
制作由皇祖儀章藉老儒  
萬靈欽受紀七聖亶承圖  
柴望



兼虞典登封略漢模巍基錯采繪法象備堪輿丹戶乾  
坤闢雕墻海嶽扶瑤壇上星斗琳觀俯虛無輔弼朝玄  
座勾陳衛紫樞風含浴殿暖雲臬露盤孤好時瞻春祀  
高高聽夜呼公侯守禁籞虎旅發金吾玉輦臨犧宰珍  
饈走膳夫廟縣鏞鼓列庭舞羽干趨俎豆聯周簋圭璋  
飾夏瑚祠官足錦繡道士住蓬壺澤草三花綻宮霞五  
色敷時時聆磬管鬱鬱鎖松梧日月藏金櫃龜龍祕赤  
符祈天洪洛誥渡海斥秦誣社甫唐三禮班生漢兩都

侍臣從此賦千載頌文謨

壽許司馬

間代生豪傑乘時見哲人雄姿龍馬異偉器廟廊珍浩  
蕩天開運崔嵬嶽降神扶持元有自制作固無倫磊落  
先朝事崢嶸報主身九霄隨日月萬里出風塵柱下曾  
簪筆臺端早曳紳觸邪持豸角糾繆逆龍鱗道直官頻  
謫時危志不伸流言鑠金石雅操厲松筠行路知桓典  
專城借寇恂清譽高士論優詔闡皇仁紫禁彈冠入黃

沙捧節巡讜謨仍寡合正氣凜難馴厚寵臨危辱幽期  
邁隱淪班行看解綬河上羨垂綬謝卧東山裏夷歸北  
海濱蒼生懸望切青瑣薦書頻改革逢多難倉皇憶舊  
臣帝心虛簡在神武藉經綸指顧三邊靜吹噓四表春  
朝廷推汲黯帷幄用陳遵圖識魚蛇變營觀虎豹飭赤  
墀分雨露盡省接星辰下殿常宣問臨軒數見親御香  
攜滿袖瑞錦賜袍新不屈朱門貴能憐白屋貧散衙時  
待士開閣晚留賓片善無攸伏微言得具陳重聞俱鏤

鑷諸子益振振竇氏燕山桂莊生漆園椿趨庭羅彩服  
列鼎席文茵夢燕佳辰協乘牛紫氣真庶司欽軌範斯  
世待陶甄願保喬松歲長登要路津頌聲垂琬琰勲業  
上麒麟末進瞻休采愚衷實忤忤魏公中土彥誰謂德  
無鄰

壽泉山先生

德業台衡望精神光嶽靈漢儲懷羽翼周士服儀刑紱  
舄登三省臯比擁六經飛章白獸闡解組鳳凰亭慷慨

陽城餞悽惶楚澤醒丹心對日月白首卧滄溟積慶璿  
源濬垂芳奕葉馨彩衣萊子宴玉樹謝家庭海嶠神仙  
窟烟霄鳬鶴銅樓身葺薜荔返老斲松苓花映衣裳古  
芝凝眉髮青三山開壽域萬里動文星雨露知桃李春  
秋報莢冀聖朝耆俊禮早晚貢雲扃

簡粹夫

二十知學道于今猶未真白髮空愁我金丹不遇人側  
身向天地舉足墮風塵乘雲空有興涉海浩無津聞君

能鍊骨妙論頗通神  
倘惠長生術高揖謝親賓

送梁鴻臚之什邡次孟望之韻

王官葉縣宰仙令漢庭聞寵餞  
傾朝俊清光憶近君  
鷁舟三峽去鳧舄九霄分  
錦水流營月巴山入陣雲  
朝廷再遣將郡邑半從軍  
雍齒封侯地期君早樹勲

寄贈王子衡御史時按關中

獨坐清關內臺中覺汝賢  
岳嶠天下險周召國風先  
按節人文朗登臺使命宣  
豺狼避驄馬神鬼泣龍泉  
文彩

驚流輩徵庸憶往年衣冠隨謁帝館閣望登仙省接星  
辰近池臨雨露偏畏途逢改革新法忤權奸放逐江湖  
去飄零歲月遷地卑棲鍛羽天近起聯翩殘寇猶衝突  
蒼生極倒懸專征空授鉞募戰豈論錢漂血江河赤僵  
尸楚蜀連俊才兼武畧要地有威權馬上排金戟軍前  
贈玉鞭笑談安石計激切賈山篇漢苑南山下秦城北  
斗邊相思一回首萬里各風烟

贈良伯

帝座神仙侶天河烏鵲橋常時異棲息今日共雲霄念  
子飛騰入相看衢路遙人猶惜騷衷吾已嘆鷦鷯苑旭  
高雲閣宮花並玉鑣明光羨起草努力在清朝

贈劉生

劉生何激昂下筆已成章誰敢輕年少吾尤重老蒼王  
揚操翰墨游夏早升堂汗血真龍種奇毛本鳳凰炎天  
留玉樹花夕映冠裳霄路雲鴻羽他時看爾翔

送鄭伯生送親還夷陵



送喜潘輿動承懽解玉簪私情烏鳥疏恩詔鳳凰林晝  
錦供萊服秋懷罷越吟路難回馭志江穩放舟心雨露  
殘冬景風塵靜夕陰荆門巴國盡巫峽楚宮深碧樹猶  
春色黃鸝更好音莫因鄉土樂長往故山岑

聞河南捷呈閣內諸公

近得河南定旋收東海疆元克親受縛餘孽遠潛藏始  
失徐關險終連郢塞長狐狸窺社稷螻蟻竊侯王清洛  
千營駐黃河一葦航詎能逃汝漢那敢傍嵩卬勇略傳

諸將兵威借朔方中丞兼節制上宰極扶匡霽色瞻宮  
殿陰氛散渺茫凱音連報捷獻壽屢稱觴天子開麟閣  
羣公奉柏梁中興當此日漢武是今皇愴往衣冠禍  
哀茲盜賊猖缺折悲相國開網見殷湯格閭中原血誅  
求海內瘡猶須哀痛詔可少治安章斟酌調元氣扶持  
立紀綱薦新行太廟覽政坐明堂不獨殲豺虎還應感  
鳳凰蒼生倚君相拭目看時康

子衡在獄感懷二十韻

朋儔日乖蹇念汝涕如瀆賈誼生非晚鄒陽志不羣書  
從梁獄上哭向漢庭聞天地虞羅密江湖釣餌芬路豺  
那可問屋鼠竟難熏已懼蒼蠅點真成貝錦文神龍在  
污淖鷺鳥失青雲日月盆還覆薰蕕器不分斗間誰辨  
劍野外枉懷片談虎嗟何及亡猿禍已云高才元脫略  
衆口但紛紜木直防先伐蘭芳忌自焚畫臺幽白日冬  
井下霜氛曉榻明星晷陰牆白草曛連駝虛繾綣尺牘  
阻慙慙石父遭齊相鍾儀滯楚軍受書賢不死演易聖

猶勤縲紲終非罪文章固有勲  
燕臣霜霰烈庶女震雷殷  
佇見天王聖金雞早赦君

寄題丹陽孫氏七峯山房

聞爾山房勝青天秀七峯芙蓉疊  
日月雲霧裊杉松堦倚岳巒積  
窻通洞壑重丹霞互明滅  
瑶草自春冬靜得沉冥趣  
幽探仙聖蹤源潭暗雷雨  
白晝有蟠龍

蓉溪書屋

書屋蓉溪曲雲林蜀嶺斜  
一經韋相業萬卷鄴侯家  
檻

護連枝秀池看並蒂葩謝庭森玉樹漢省接金華山月  
岷峨雪江天灔澦霞花潭通白石錦水出丹沙星野光  
芒聚鴻霄羽翼遐地靈與文物今古擅三巴

方朔圖

調笑東方朔沉酣金馬門竊桃王母見懷肉漢皇恩月  
下雙鸞返雲間八駿奔玉盤春不獻丹核代長存事往  
丹青錯圖開錦繡屯素湍搖弱水玄圃折崑崙種樹非  
潘縣迷花似楚村千年一結實萬古自蟠根海日紅猶

爛天風裊更繁神仙皆羽翼洲島異乾坤無路乘黃鶴  
何由踏赤鯢市朝棲大隱那識歲星魂

友竹

買園惟種竹身與竹為儔一逕白雲裏千竿清吹幽江  
亭朝對雨水榭早迎秋翠袖天寒倚朱絃日暮愁風因  
故人至月為此君留逸駕今誰並前身是子猷人多嫌  
寂寞吾獨慕清修苦節長如此虛心不外求琴樽忘老  
病几席共綢繆歲晚根逾固霜繁花益稠山空鷓鴣怨

海濶鳳凰憂高志寧須待深棲且自謀何因孤興發吹  
笛上君樓

渡涇渭

秦集

北回亂涇渭東眺極澄瀛落日兩盪潏遙天雙帶紫波  
流互明滅岸折屢崩驚

一作洲渚  
各縱橫


隔樹

一作  
歲

望迴合分

濤揚濁清堰渠饒上壤形勢迥西京漕挽通秦甸津梁  
跨漢城湮沉九州會雄壯八川名空挹入河志復含浮  
海情風沙滿世路雲浪渺江程鵲去星源遠鯨翻霧島

輕片帆儻可借萬里自茲行



大復集卷二十三